

48398

قانون الدنيا الساخر

شعر عامي

نبيل عبد الحميد

دار روعة للطباعة والنشر والتوزيع

الطبعة الأولى ٢٠١٣

"قانون الدنيا الساخر"
شعر عامي

نبيل عبد الحميد

غلاف / أحمد فرج

الطبعة الأولى ٢٠١٣

دار روعة للنشر والتوزيع

المدير العام/ هبة الشرفاوي

هاتف / ٠١١٤٠١٧٨١٤٤

إيميل/

darrawaa@yahoo.com

رقم الإيداع / ٢٠١٣/٨٥٦٤٤

الترقيم الدولي /

978-977-6411-48-6

إهداء

إلى زوجتى الحبيبة .. رفيقة العمر و شريكة الحياة ..

إلى نورين و نوريان ..

أحبكم ..

نسل عبد الحميد

مقدمة

لم أكن أتخيل أن يأتي اليوم الذي سأجلس فيه هكذا لأكتب مقدمة لديوان يحمل على غلافه اسمي و يحتضن بين صفحاته كلماتي .

ربما هو ديواني الأول ، ربما الأخير ، لا أدري ..

رؤيتي للشعر – إن جاز أن أسمى ما أكتبه شعراً – ليست أنه كلاماً موزوناً و مُقفى تُطرب موسيقاه الأذان فقط ، و إنما فكرة قد تُذكرك بما كنت تنساه ، أو تلفت نظرك إلى ما كنت تتناساه ، أو على الأقل فهي فكرة أو خاطرة مرت بذهني وامتلكتنى فقررت صياغتها في قالب موسيقي بسيط.

قد تجد هذا الديوان كئيماً ، قد تجده واقعياً ، قد يعجبك ، قد لا يعجبك .. هذا لأن الإحساس بكل أنواع المشاعر هو إحساس نسبي ، قد تقرأ قصيدة حزينة في أوج سعادتك فتتفر من هذا الكتاب ، و العكس بالعكس ..

لذلك ، أنصحك ألا تقرأ هذا الديوان مرة واحدة .. حاول أن تقرأه أكثر من مرة ، ضعه في مكتبتك ، على طاولتك ، ربما تكتشف جديداً في كل مرة لم تلتفت إليه قبلاً .

نبيل عبد الحميد

جدة

ديسمبر ٢٠١٣

كان يفكر بس يعيش ..

ظبط الساعة و قفل الشيش ..

شد الحافه و غطى همومه

نام ولحد الآن ماصحيش ..

من الشبه أربعين

بالصدقة شفته في الطريق

بعد السنين ..

صاحبي اللي كان في المدرسة

أيام ما كنا صغيرين ..

فعلاً دى ديتا صغيرة

عمره إللي فات يا هل ترى

كان هوفين ؟ ..

هل كان بعيد ؟ ولا هنا ؟

أنا رحت أنا دي عليه و أنا

غرقان حنين ..

و فاجئي لما لقيته قاللي

"إنت مين ؟ "

بصيت عليه و أنا بسمعه

شارد حزين ..

معقوله عُربتنا تكون

هَيَّا إِلَيَّ بَاقِيَه مِن السنين ! ..

يا خسارة يا عُمر إتَفَقَى

يا خسارة يا ضهر إتَحَى

رَدَّيت أَنَا

" حَقَّك عَلَيَّا يَا عَمَّنَا

يَخْلُق مِن الشَّبَه أَرْبعين " ..

عقارب ساعتي

عقارب ساعتي تتسابق مع اللفات
تخطي الخطوة تتقدم ولا ترجعش ..
يُرُ العُمر في اللفة ورا اللفة
و فاكّر نفسي في اللفة
ولا بكبرش ..
يادوب ألحق ألم الفرح فدقائق
و أقول للوقت يتأخر
ميتأخرش ..
و تجري الساعة فد الأيام تخلصها
و مها أصرخ
عقارب ساعتي مبتسمعش ..
لاانا عارف لفين العُمر راح يّيا
و لا عارف

أجيبلى عُمر تانى منين ..
أنا طفولتى و كُل اللعب كان ساعة
و باقى الوقت متردد
ما بين وما بين ..
أنا إالى ساعتى خدعتنى بـ دايرتها
خدت وياها أوقاتى
ف غمضة عين ..
تدور بيّا وماسكة فـ إيدى بالقوة
وأبص فـ قلبى من جوه
أشوفه حزين ..
يدوس عقرب على أملى و يتجرأ
و عقرب تانى بيفرق ما بين إثنين ..
يخطى الخطوة يتقدم ولا يرجعش
و مهما أصرخ
عقارب ساعتى مبتسمعش ..

الميكروباص

في الميكروباص

بتحس إنك جوّه دُنّيّا مُصغّرة ..

سوّاق و دايس في الكلام رَغّاي

و لّع سيجاره و يّا شفطة شاي

شَغْلُ شريط هابط

يسمع زباينه إزاي !

لو حد فيهم

قاله هات زُعين ورا ؟ ..

جنبه تلاقي حاجة م الاتنين

حتّه طرّيّة حاجزلها الكرسي

أو شاب دافع حق كُرسیين

خمسين مرائّه محطّطين للمسخرّه ..

واحدة قُصاد البست و بناتها

رايحين فرح بتاع ابن عمته
إلي زمان كان هو ذنيتها
بس الفرص كانت معاه متأخره ..
قاعد عجوز راكين على الشبتاك
باصص على السكه
لامح نهايته هناك
لو تعرف إلي باليه
هتهون عليك بلواك
دا عيالُه قاسية عليه
عشان المنظرة ..
واحد مريض قاعد فآخر صف
عيان بقاله شهور
ع الحكماء كان يلف
و فإيده كيس الدوا
عشمان يانه يخف

لكن دواه هيفيد بإيه فد إالى جرى ..

بنئين بيحكوا لبعض

قصة حُب فات

كان جنبهم واحد

بيسمع من سُكات

مين إالى غلطان و السبب

مين إالى خلا القلب مات

كُل الحكاوى فى النهاية مُكررة ..

ووصل خلاص الميكروباص

و الكل ماوصلشى

الأجرة يا حضرات

مين إالى ماحاسبشى

الكل مَدّ إيديه يدْفَع عشان يمشى

سابوا همومهم

ع الكراسى مبعثرة ..

جائز خير

متضيّعش دقائق عُمرِكَ

في التفكير ..

جائز كُلّ إلى بيحصلِكَ

يطلع خير ..

جائز بعد ما تخسر حاجة

تكسب تاني بدالها كتير ..

خليك عادى و جبّ تعيش

إخطف بُكرة ف لحظة طيش

قابل يومك

ناسى همومك

وزّع فرحك متخلّيش ..

و ما تبخلش بضحكك ليك

أصل اليوم لو راح ميّجيش

حلمك دفتر

خطوط و إكتب

حرف ف كلمة ف سطر كبير ..

جرب دوق طعم التغيير

جائز كل دا يطلع خير ..

نظريات فى المراية

(١)

مهما تتلون فُصادها .. أو تَبْدِل ألف وِش ..
مهما هتحاول تداري .. مهما تكذب أو تَغش ..
برضه صُورتك هتيا هتيا .. و المراية مبتجاملش ..

(٢)

رغم إن السطح عاكس
صُورة جُوة و أصل برة ..
إلا إن الصُورة حلوة
و الحياة فى الأصل مُرة ..
السبب إن المراية
مش تملي بتبقى حرة ..
بعد صُورتك عن مِرايتك
ضعف بُعدك ألف مرة ..

(٣)

المرآية سطح فاصل

مستوي مفهوش زوايا ..

دُنْيَا بَرَّة و دُنْيَا جَوَّة

مُسْتَمِرَّة بدون نهاية ..

بس إيه خلاك مصدق

إننا أصل الحكاية ..

جائز إن الأصل بَرَّة

و إحنا جَوَّة في المرآية !

سلام

و آخر كلمة قلناها
ليلتها "سلام" ..
و أخذ بالك على زوْحك
و أنا سيني
أُكِلْ عُمري بجروحك
و مِن قلبي بقولها "سلام"
و لما هتيجي ليلة تنام ..
بلاش تَقْلَقني من نوي
بلاش تناديني في الأحلام ..
و تحكيلى عن القِسمة
و تيجي تقولي كام كلمة
خلاص
مبقاش في بيننا كلام ..
و لا من تاني هسمعلك

ولا حُب السنين فينا

هيشفعلك ..

ولا الماضي

ولا الأيام ..

وَمِنْ قلبي بقولها لك

يُجد سلام ..

قانون الدنيا الساخر

بُص و دور جوة حياتك

تلقى قانون الدنيا الساخر ..

لما الحاجة بتبدأ عادي

مبتحلوش

غير في الآخر ..

قوللي إزاي

..

زي أما إنت بتعشق مثلاً

آخر شفقة في مَج الشاي

زي نهاية لحن حزائني

لما بتسمع صوت الناي ..

شُفت إزاي !

لما قُعاد القهوة بيحلا

وسط الشِّلة فآخر اليوم ..

زي ما ريحة الأكل تَشِدْكَ

آخر ساعة فوقت الصوم ..

حتى النوم

مبيحلوش غير في الآخر

أول لما بتيجي تقوم ..

..

حاجة جميلة

لما تحس إن إنت بتفهم

لما تذاكر آخر ليلة ..

شوف إحساسك لما بتوصل

آخر الخط فسيكة طويلة ..

جمل كناقك

مبيحلوش غير في الآخر

أول لما تحط الشيلة ..

آخر متر

لما جريته يومها بسرعة
علشان تلحق آخر قطر ..
لما نجحت و شفت القايمه
و لقيت إسمك آخر سطر ..
حتى خشوعك
مبيحلوش غير في الآخر
آخر سجدة فركعة وتر ..

فكرك ليه ؟

لما تشوف جوه الفاترينه
شئ طول عمرك نفسك فيه ..
يطلع تمنه معاك بالمللي
آخر ورقة بد عشرة جنيه ..

تلقى قليلك

مبجلوش غير في الآخر

لما البركة تحل عليه ..

..

يقي قانون الدنيا الساخر

إن حلاوة الحاجة أواخر ..

يعنى الحاجة بتبدأ عادى

و متجلوش

غير في الآخر ..

ساب الحاجات

إكّين أبوه

داير ييجري ع الرّغيف

ساب العلام و العلم

و إللي إتعلّموه ..

سايب معاهم

لعبّة شافها في الطريق

كانت في إيد عيّل

ييلعب ويا أخوه ..

شال شنطة العدة

و شال حمل المشال

كتفه الصّغير شال مشايل

كبرّوه ..

و برغم صغر السن

و العُود الضعيف

واقف بياخذ

سِر صِنعة إيد أبوه ..

و إكين أبوه

داير بيجري ع الرغيف

ساب الحاجات

من قبل ما هُما يسيبوه

صمّص شام

أموت وأخرج أنا وإنتي
و نتكلم و تتمشى ..
نشبك إيدنا ع الكورنيش
في وسط الزحمة و الدوشة ..
و أنا إالي ف جيبي ميكفيلش
عشان لو قُلتني نتعشى ..
لكن مُمكن نجيب ترمس
و ممكن برضه حُمص شام ..
صحيح الحالة مش ماشية
لكن بكرة
هتبقى تمام ..
هتتغّل و بكرة تروق ..
ما تيحي نروح سوا ع البرج

و أوريكي البلد من فوق ..

و أشاورلك علي أوضتي

على سطوحنا في باب اللوق ..

هناك أنا كنت بشتاقلك

هناك أنا كان قاتلني الشوق ..

و ياما هناك سهرت أحلم

لحد ما دايت الأحلام ..

لكن هتروق و تبقى تمام ..

أجييلك تاني مُحص شام ؟

كادرات

كُلُّ إِلِي بَان فِي الكادر
لُهْ جَنْبْ مَشْ مِتَشَافْ ..
كُلُّ إِلِي مَشْ بَاين
كَانْ ضَهْرُهْ لِّلْكَشَّافْ ..
كَادَرَاتْ وَ فِيهَا النَّاسْ
مَرْصُوصَةٌ خَلْفْ خِلَافْ ..
بِرَاوِيزْ خَشْبْ سَايِيه
تَتَشَافْ مِنْ الْجَنْبِينِ
هَتَشُوفْ وَ مَشْ هَتَشُوفْ
حَسْبْ إِنْتْ وَاقِفْ فِينْ ..
وَفْ كَادَرْمْ الكَادَرَاتْ
بَنْتْ وَ وَلَدْ وَاقِفِينْ ..
بَايُونْ مَعَ الطَّرْحَهْ

و البنت م الفرحة
غابت عن الحاضرين ..
كانت معاه دايه
ناسية إنها سايبه
واحد في كادر بعيد
كُل حياته حزين ..
إكثته مش ناسي
كُل إلهي كان مكتوب
في حكايته وياها ..
حاول كثير ينسي
كُل إلهي كان لكن
مقدرش ينساها ..
كادرات ورا كادرات
تتغير الكاميرات
والصورة هياها ..

وإمّنه كان بيخاف

علشان كده قرر

لو كادر يتصوّر

ميكونش فيه متشاف ..

و عشان كده دائماً

كان ضهزه للكشاف

مات مسكين

و مسكين إالى مات فأكّر

يان الدنيا من بعده

هتبقى جداد ..

و كل إثنين يتلاقوا

هيبقوا بعد موته بعد ..

و كل حروفه في النوته

متلقاش إالى يعزفها

و كل وشوش بيعرفها

هتكسيها الليالي سواد ..

ميعرفش إن نص الناس

دموعهم في البكا عيرة ..

و آخر عهدّه في الحنة

صوان الأهل و الجيرة ..

ولا متبقي من ريخته

يدوبك

غيرش كام سيرة ..

و تكشيرة

على وشه

في صورة إتعلقت في جدار ..

و كام نمرة مع صحابه

و كام موقف

في كام مشوار ..

و كوم أسرار

معاه مانت

و فانت فوق بلادها بلاد ..

و قال كان فاكرا الدنيا

هتبقى بعد منه جدار

لو مسافر

لو مسافر خلّي بالك
خُذ معاك كل الحاجات ..
صُورَه ليها
و صُورَه ليهم
صُورَه مِن كل إلهي فات ..
خُصَلتين
مِن شَعَر أُخْتِك
وَيَا منديل مِن أبوك ..
طَبْطَبَة
مِن قَلب أُمِّكَ
رِيحَة مِن بَرَفَان أَخوك ..
بُكَرَة لَمَّا تَحِينُ يَمَكِين
ييجي وقت وينفعوك ..

لما يبقى الباقي فيهم
بس حبة ذكريات
والحنين يقلق منامك
وسط غربة ليلها كافر..
خُذ معاك كل الحاجات
خُدها وياك
لو مسافر

حسابك صفر

تحسب شمال في يمين

ناجح سنينك فين

تلقى النتيجة بـ صفر..

تجمع فـ عمر الشقا

بين الفراق و اللقا

ويّا إلهي راح منك

في بيوتك الضيقة

يطلع حسابك صفر..

تطرح ساعات الفرح

بعد الخصام و الصلح

من قسوة الأيام

تلقى حساب الطرح

بعد المحبة بـ صفر..

تقسم عليك نفسك
يومك على أمسك
بكره على إلهي جاي
ماشي ف طريق عكسك
القسمة خارجة بـ صفر ..
تضرب هواك في إثنين
لكن حبيبك فين ؟
مات النصيب بينكم
و الحلم بقي حلمين
فُضِّلْتُ حقيقتك صفر ..
صفرين مع اللاشيئ
مشوار مالوهش طريق
سِكَّة آخرها سراب
عِشَّة ما فيها صديق
تبقى النهاية بـ صفر ..

تذكار

يا أم الكلام كروان
على لحن حرفك طار ..
مُشتاق أنا مِنك
لجل الهوى تذكار ..
يا مَوْقَعَة الشُّطار
إرميلي حتى الشال
أو حتى طوق شَعْرِكَ
أو قَص م الخللخال ..
طب هاتي م المتشال
و سيبيني أنا إل أختار
و آخذ حاجات مِنِّكَ
لجل الهوى تذكار ..

يا أم العيون أسرار
إدبني قُطن و شاش
لجل أما أداوي جراح
تذكرك إلي مجاش ..
مكتوب لقلبي إن عاش
هيعيش عشان يختار ..
يستنى شئ منك
لجل الهوى تذكار ..

توب الخيش

لما المطر سرسب
أنا تُوبى كان من خيش ..
كاسى و مش كاسى
عبّيت أنا كاسى
منقوع من البراطيش ..
أشرب عشان أنسى
بدل الكاسين خمسه
بدل البلاطى مفيش ..
بـأتمشى في الحارة
آخذ هوا فـ بدنى
بس الهوا خدنى
على سبكه متوديش ..
سرق إالى كان حيلتى

خد منى جُوز نعلی
و أنا مین هیسمعلی
صوت الفقیر بیطیش
و فزحة الأيام
سعی الفقیر بیضیع
بس الرصیف سَمیع
یسمع و ما بيشکیش ..
طبطب علی کتفی
کرمش فإیدهُ فلوس
وطیت علیها أبوس
قام الرصیف مرضیش ..
وطیت أبوس تانی
زاد الرصیف بقشیش ..
مکشوف علی الأيام
و عنیًا مکسورة

فأنا قلت آخذ صورة
للذكرى لجل تعيش ..
و أمانة ف رقبتي
أول ما يقال بيت
له هُطها ع الحيط
جنب الإزاز و الشيش ..
و أدعى و أقول يارب
إرحم عجوز كركب
لما المطر سرسب
توبه دا كان من خيش ..

عزيزي المواطن

عزيزي المواطن في هذا البلد
و ساكن في أوضة و كاسر إيجار ..
عزيزي إلهي عندك بنته و ولد
و ساب المرتب جيوبك و طار ..
عزيزي المقاطع لصنف اللحوم
و عامل نباتي تحب الخضار ..
و داخل ف جمعية ويا الحبايب
و فاضل على القبض عمر إنتظار ..
عزيزي إلهي نازل
على الشغل بدري
و راجع مدروخ في آخر النهار ..
و عشان في يوليو
يجيبك علاوة

و مستنّي لحظة صدور القرار ..
أطمئن سيادتك و أقولك هتفرج
مسيرك تودّع سنين المزار ..
و تنسى البصارة و طعم الفاصوليا
و عدم المؤاخذة هتنسى الحيار ..
و تبقى تقابلني جنابك ساعتها
يدوب بس لما
يموت الحمار ..

•

فيزيا

حاجات في الفيزيا خدناها
و طلعت كذب مش أكثر ..
عرفنا لما شُفناها
مع الأيام بتتغير ..
علامنا كان غلط لكن
عرفنا الصبح متأخر ..
وليه الحق في الدنيا
يجيله الوقت يتبخر ..
يلف اللفة و يرجع
و يغلط زينا في الإسم
سكون الجسم
لا يعني
بانه في الأساس خامل ..

سكون الجسم أحياناً
يبقى من وجع شامل ..
وتطلع م الوجع طاقة
تهد ف حيلنا بالكامل ..
و تقلب نفسنا علينا
سكون الجسم في الفيزيا
موش زي السكون فينا
سكوننا تملي يبقى لتحت
ولا عُمره يبقى لفوق ..
سقوط الضوء
على عُنصر
بمعكس ع العيون لمعة ..
لكن جرب تعيش مرّة
ضلام ليالك على شمعة ..
و دقق في الوشوش جنبك

هتلمح في العيون دمة
و تلمح جنبها مرارها ..
سقوط الضوء على الحاجة
بيكشف كل أسرارها ..
ويوضّح ويكبّر ..
ويكبر إحنا و نلاقي
حاجات في الفيزيا خدناها
بتخدعنا و تتغيّر ..
علامنا كان غلط لكن
عرفنا الصّح متأخّر ..

ص متعرفوش

بقعة ضلمة جوه منك
فيها سير مبتقولوش ..
تخفى فيها بقايا ماضى
أى حد ميعرفوش ..
فيها إنت لسا شاييل
كل تفاصيل العمايل
إلى كانت سودا لما
جت ف وقت متنسَاهوش ..
فيها "إنت" الحقيقي
بالطبيعة العايشة فيك
فيها أفكار مُستحيلة
ياما كانت بتناديك
فيها طبعك و إلى زيك

لو فيه طبع ميسلاهوش ..

بُقعة ساتره عليك كتير

لو بيان يمكن تموت

صورتك إالى برّه منها

غير داخلها لو تفوت

إلى برّه "إنت" تانى

إلى جُوه ميعجبوش ..

بُقعة ضلّة إزازها عاكس

إلى برّه يشوف مرايه

وإلى جُوه فى المُعاكس

برضه فيه نفس الحكاية

لو يحاول يرمي نظرة

ع إالى برّه

ما يشوفوش ..

فى النهاية

عايز أقولك

إنك "إنت" إثنين ف واحد

إلى جوه الضلمة

"إنت"

كاتم الأسرار وقاعد

وإلى برّه في الحقيقة

يبقى حد متعرفوش ..

عاري

الردود ثابتة في كلامنا

"نص نص"

أو بمعنى أصح

"عادي" ..

حبة أبعد

حبة أقرب

يعني لون الكون يلعب

في الرمادي ..

يعني مش لازم تحتي

إن نص الكاس معي

و نصه فاضي ..

مرة يطالع طولُه عَرَضُه

مرة يبقى مفيش و برضه

تبقى راضي ..

مانتا حالك نفس حالنا

و الردود ثابتة في كلامنا

"نص نص"

أو بمعنى أصح

"عادي" ..

الشنطة

لَفَّ سافر في البلاد
راح و طَوَّل في الغياب ..
ساب حبايب
ساب قرايب
ساب شوارع
ساب صُحَّاب ..
راح هناك لجل المعاش
راح وفات وقت و مجاش
و ف نهاية العمر راجع
لما لُون الشعر شاب ..
جِه و مالقاش حد م إلى
كانوا صُحبَه معاه تملي
ع القهاوى و ع السطوح

جِه و كان مليون طموح
يلقى فى رجوعه الشباب ..
جِه و مالقاش إالى سايئه
جِه و كان كل إالى جايئه
آخرة الغُربة و مافيا
و إالى عُمره راح عليها
شنطة فوق ظهر الدولاب ..

أحارب كيف ؟

مرّت أمامي بين زهو جيوشها .. كُلُّ الكتائبِ تستعدُّ قتالا
يا ويلتي من نصلِ سيفِ عيونها .. و من السهامِ الفاتكاتِ جمالاً
أين الهروبُ من الجنوبِ مفاتيئُ .. وَمِنَ الضفائرِ حزمَتَيْنِ شَمالاً
إن كان في موتي بِحُبِّكَ حُرمةٌ .. كُلُّ الحرامِ الآنَ صارَ حلالاً

و أحارب كيف ؟

و أنا بيدي مفيشي سلاح ..

و درعي فيكي كان خييان

و رمشك فينا كان دباح ..

و سيفك

فوق رقاب الخلق

و أنا عمري ما شلت السيف

أحارب كيف ؟

و أنا أصلاً مانيش فارس
ولا عُمرِي رَكبت الخيل ..
و أحارب مين و أنا واحد
ما يعرف غير غنى المواويل ..
قليل الحيلة طول عُمرِي
بتوه بين الصحيح و الزيف
و أحارب كيف ؟
يا قادرة و أبوكي كان قادر
يا دايسة ع القلوب بمداس ..
يا كُرباج الحروف صوتك
و يا سكوت الكلام في الناس ..
يا زاد خيرك على غيرك
و أنا داري ما فيها رغيف
أحارب كيف ؟

علم و عاش

علم ف صورة
واخذه مكانها ف وسط الحيط
فيها الشجرة
و فيها البيت
فيها الخوف كان لسا مجاش ..
علمي صحيح كان فيها زيادة
رغم إن الأحلام في العادة
قلبي مَصّر ميعلمهاش ..
صدفت مرة ف علم و عاش
عاش العلم و مش هتصدق
إن العلم صحيح إتحقق
لكن
أنا متحققليش ..

عاش الحلم لواحد ثاني

واحد غيري

ميشبهلش ..

عاش الحلم و لكن صاحبه

ميت

مش مكتوبله يعيش ..

الوابور

تِلْت ساعة لسه باقية
قبل ما ييجى الوابور ..
في المحطه هُو واقف
خد مكانه في الطابور ..
كان هناك قُدامه خمسة
زُبع ساعة باقية لسه
قال ياريتنى كنت أَوْقَّف
العقارب لو تدور ..
المُهم ..
خد له كُرسى درجة تالته
هُو أصلاً طول حياته
فكُل حاجة
درجة تالته ..

بس هُوَ كان صبور ..

ما علينا ..

حط شُئطُه و المشايل ع الرفوف

مدّ إيده فِ جيب قميصه

عشان يشوف

صورة إبنه

إلى واحشه

أصله سايئه من شهر ..

خد كمان صورة مرأته

بص فيها

كان يأيده مـ إلى جنبه

بيدارها

حامي طول عُمره و غيور ..

عدى بياع الجرايد

قاله هاتلى يا بنى واحد

جائز ألقى فيه وظيفة
حلّوه من بين السطور ..
جاله واد يتاع به ساقع
إروى عطشك
ياللى راجع
قاله إفتح واحده صودا
يمكن الأحزان تفور ..
بعد حبّه
قال يغمض عينه حبّه
و المعاد يصبح قريب ..
فجأه فاق على صوت رهيب ..
بصع الناس إالى راكمه
كله مرمى ع القضيبي
و العجل
بطل يدور ..

حسّ روحه طالعه منه

مدّ إيدّه ف جيب قميصه

غصب عنه ..

قال لابنّه :

كنت جايك

بس ما رضيش الوابور ..

•

شايلى كتيىر

و لو رجع الزمن بيتا
لكل ما فات
حاجات كانت هتتغير
و تتبدل مكانها حاجات ..
و أرسيم خط سير و أمشي
و أكمل إلي ما كملشي
من الحكايات ..
و لو رجع الزمن بيتا
ليوم ما وقعت في الضلعة
و أنا خايف ..
و كنت أصرخ في وسط العتمة
" مش شاييف " ..
لـ كنت ساعتها هستحمل

عشان عارف ..

يان الخوف من الضلمة

مهواش خوف

وإن الراحة في الدنيا

مهميش بالشوف

وإن إلهي يقع لازم

يقع واقف

و يحسب تانى فى الحسابات ..

و لو رجع الزمن بيّا

ليوم ما الأبله ضربتني

بدون داعي ..

و سايت خط عصايتها

على دراعي ..

لـكـنت فـيـومـها هـتـأسـف

لأوجاعي ..

عشان الضرب في الدنيا

أُكيد أكثر

و خط عصاية الدنيا

أُكيد أكبر

و دُقت الضرب بالجملة

و قطاعي ..

لحد القلب فتيا ما مات

و لو رجع الزمن بيتا

لكل ما فات ..

حاجات كانت هتتغير

و تتبدل مكانها حاجات ..

•

يبقى مين ؟

كل يوم بسأل مرايتي
إللي جُوه يَقي مين ؟ ..
متقوليش إن إللي جُوه
يبقى أنا
متقوليش أنا عُمرِي يَقي
كام سنه
و إن لون الشعر لـ ابيض
فوق دماغي
يبقى شيب ..
و إن إحساس الطفوله
جُوه مِنِي
يبقى عيب ..
أنا لسا عُمرِي يادوب يومين

يوم راح في أوهام الأمل
و الثاني تايه في السنين ..
إلي جُوه يبقى مين ؟
إلي جُوه
شخص عاش العُمر خايف ..
أعمى كان دائماً يعمل
نفسه شايف ..
فجأة ستر العُمر أصبح
ستر كاشف ..
حتى كرمشة الشفايف
ساية سطر من السنين ..
إلي جُوه يبقى هُو
بس هُو مكانش عارف
هُوَ أصلاً
يبقى مين ؟ ..

على فين ؟

هي الأيام لما بتخلص
بتروح على فين ؟ ..
مقصدش نموت
أنا أقصد لما اليوم يعني
بيخلص و يفوت
و تعدي وراه أيام تانيين ..
و أما الأسبوع بيعدي أوام
و يقل ست ايام بالطول
مع يوم بالعرض
بيروح على فين
و يسيب الأرض ؟
طب فين المخزن و التخزين ؟ ..
معقوله تكون أيامنا هناك

مرصوصة ف حبة كراتين ؟ ..

مليانة بـ إمبراح و بـ أول

و بـ أول أول و أنا راجع

لما أوصل سن الستين ؟ ..

طب هقدر أطلع م المخزن

إحساسي بنفسي و بالناس

و خناقي إمبراح في الرحمة

و أصالح سواق الباص ؟

هل ممكن أزود إخلاص

لعلاقتي بكل إلي أعرفهم

لسنين و سنين ؟

هل ممكن أدور على فترة

ضاعت من سن العشرين ؟

هل ينفع أستجّل رغباتي

و أختار أما أكبر و أستكبر

أنا هطلع مين ؟

هل يمكن لو

أو هل جازر ...

بل لا يمكن ..

إننا نعرف

إزاي الأيام دي بتنقص

و أما بتخلص

بتروح على فين !

بنكبر

بِنَكْبَرٍ وَ نِكْبَرٍ وَ بِنَقُولِ هِنَقْدَرِ
نَلَاقِي الْمَقْدَّرَ بِيَعْتَدُ مَعَانَا..
بِنَكْتَبِ وَ نَحْذِفُ وَ نَكْذِبُ وَ نَخْلِفُ
فَ نُوْعِدُ وَ نَخْلِفُ مَعَادَنَا وَ لُقَانَا..
نَتَوَهَّيْنَا فِينَا
نَدَوِّرُ عَلَيْنَا
يَضِيعُ مِنْ إِيدِينَا
تَعْبِنَا وَ شَقَانَا..
نَحَاوِلُ نَجْرِبُ
نَشْرَقُ نَغْرَبُ
وَ نَبْدَأُ نَقْرَبُ
فَ تَبْعِدُ خُطَانَا..

ع البلاط

ساب السرير و القَرش

ساب الأنتيكات ..

ساب المفارش

و الفازات ..

و المكتبات و الألبومات

و كراسي فخمة مُطرزة

ب حبة حاجات ..

مرتاحش فيهم كُلُّهم

لكنُّه مرتاح ع البلاط ..

يمكن عشان كان البلاط

يشبه سنيُّه المقسومين

في مُربعات ..

جائز كمان

علشائه أملس مُستوي
يشبه حصاد الدهر
في العمر إلى فات ..
ساب الحاجات إلا البلاط
أحسن صديق كان يسمعه
و يرجّعه
هو إلى حتى ودّعه
يوم لما مات ..

فاعل خير

فجأة لقيت الباب يخبّط

جايلي جواب ..

خير اللهم اجعله خير !

جائز واحد م الأجاب ..

شكل الطابع مش معروف

إسم الراسل ناقضه حروف

قلت أما أفتح علشان أشوف

مين في الدنيا أنا لِسّه ف باله

و إيه خلاه بيعتلي جواب ..

...

" بعد الترحيب و السلامات

أما بعد ..

جائز إحنا بعيد عن بعض ..

لكن قُلت أنا لازم أقولك
خليك واعي و صاحي لصلّك ..
أقرب ناسك
فيهم واحد
طلّع سرك برة البير ..
خليك صاحي و فتّح عينك
و إوعي تآمن غدر الغير .. "
و التوقيع
من فاعل خير ..

آخر الدهر

هو الحساب باليوم ؟

ولا الحساب بالشهر ؟ ..

مش لاقى في القائمة

كام سعر كيلو القهر ..

و عشان أنا محتاج

و السلك ضاربه الفقر ..

أيتدي ع النوتة

و حسابنا آخر الدهر ..

هو الحساب بقى كام

أنا أصلي مش فآكر ..

ولا عُمرى مرّة كتبت

ولا جبتله دفاتر ..

كان الضمير مرتاح

و نصيبي كان تاجر ..
وقت أمّا كان خيان
كان الشيطان شاطر ..
جلمك على ضعفى
زود كمان فى الصبر
أبدلي ع النوته
و حسابنا آخر الدهر ..

هات أمارة

س سؤال

هاتلي معني من العبارة :

" بكرة تبقي القشية معدن "

و الحكاية مش شطارة ..

أصل يعني إزاي هتبقى

و إنت فاشل في التجارة ..

و الصناعة و الزراعة

و الحدادة و النجارة ..

و المدارس و العلام

و المواقف و الزحام

و المرافق و الإنارة ..

و إنت داير في السواقي

و إنت عايش ع البواقي

و المخلل و البصرة ..
عشت طول العمر تحلم
يجي دورك في الإعارة ..
"بكرة تبقى القشية معدن"
طب ما تديني الأمانة ..
شاطر إنك بس تحكي
عن تاريخك و الحضارة ..

حلم ميت

شافها ف حلمه و كان مستغرب

إزاي بعد الموت بتجيله ؟

إزاي سامع صوتها حقيقي

لما صدها ردد يناديه ؟

ألف سؤال من غير إجابات ..

كان متفاجئ

كل إلهي بيحصله مُفاجئ

عكس المنطق و الحسابات ! ..

راح يسألها و جاوبت قالت :

- أسبوع فات ..

و إنت مجتش تزورني ف حلمي

قلت أزور أنا حلمك و أسأل

عامل إيه وسط الأموات ؟ ..

دُرج السنين

دُرج السنين شايل كثير ..

صورة بطاقة

و كام جواب ..

وردة قديمة مطبقة

جوة الكتاب ..

ألبوم صور

شيلة صحاب ..

و إتفرقت بيها السكك

و الحبل ساب

دُرج السنين مليون عذاب ..

دفتر قديم

و حُبوب ضداع ..

مفتاح لباب بيتنا إالي كان

مفتوح مشاع ..
وصل إستلام
تمن الضياع ..
و فاتورة فيها إلی إشتري
ويآ إلی باع ..
دُرج السنين في الرحمة ضاع ..
شخايط قلم
قصاقيص ورق ..
حرفين و سهم بيحضنوا
قلب إتحرق ..
محبس ذهب
دبلة و حلق ..
مات العيار لما الطريق
بيننا إفترق ..
دُرج السنين عُمره إتسرق ..

طبله و زمارة

دكانة ف الحارة ..

بيبيعوا فيها الموت

و بضاعة جوة تابوت ..

ولا دايماً إلا الله

و الفاتحة ع اللي يفوت ..

يا بلاد ما فيها بيوت

يا بيوت ما فيها رغيف

الماضي كان أشكيف ..

عايش معاك في كابوس

في خيالك المحبوس

جالك ف حلم مُخيف ..

يتمشى ف الحارة

و فإيدُهُ زُمارة
زَمَر بصوت عالي
جيت إنت على بالي
أيّام ما كُنت ضعيف ..
ف صحيت أنا مفزوع
خايف و مش شايف
و إن كُنت مش عارف
هـ حكيك الموضوع ..
مين إالي كان ظالم
مين إالي كان مـوجوع ..
لما العجاف حلّت
مين إالي مات مـ الجوع ..
الحرب دي حربي
و الخيل مكانش أصيل
و الدرع فيها هزيل

كان م الورق مصنوع ..
ولا كانش عندي سيف
يا بلاد ما فيها رغيف ..
ساعتى في إيد الوقت
وقتى ف حُبك ضاع ..
و أنا لما قُمت و فُقت
كان في المزارد إتباع ..
يا بؤرة الأوجاع
خَفَى عليا شوى
من يوم ما وجعك شاع
راح من عنيّا الضى ..
و الجرح بعد ما مات
صَبَح النهاردة حيّ
خَفَى عليا شوى ..
الماضي كان أشكيف

جالك ف حلم مخيف ..
و ف إيذه زُماره
زمر بصوت واطى ..
و إن كُنت أنا الخاطى
أستاهل إالى يكون ..
يا غُربى فى الكون
أنا بعت فىك عُمرى
و ما خدّت فيه عربون ..
و إن كُنت أنا التاجر
ف أنا بعت بـ خُسارة ..
كان السداد آجل
و الدفع بالتقسيط
و طلعت أنا إالى عبيط
و أهبل و بـ ريانة ..
قالوا الحساب موجود

عدّى علينا و فوت ..

هتلاقى دكّانة

بيبيعوا فيها الموت

موجودة ف الحارة ..

تاخذ هناك حقّك

طبلّة و زُمّارة ..

بواقى

جرينا ف حياتنا ندور في السواقى ..

و آخر المتمة

طلعنا ب بواقى ..

و إيه إالى راح

في السنين من إيدينا

و إيه إالى فاضل

و إيه إالى باقى ؟

يادوب ززمه فكّة

بواقى الفلوس ..

و باقى البياض

إالى كان في النفوس ..

و حبة غُموس ..

تِكْفِي الرغيف إالى باقى في معاشنا

و باقي الشباب
إلي عشناه ما عاشنا
و كل إلي حاشنا
عن الحلم إلي كانت
نهائته التلاقي ..
دا كل إلي فاضل
و كل إلي باقي
يادوبك مُجَرَّد
بواقي فبواقي ..

عكس بـ عكس

كان يجري إليه يعني
لو كانت الدنيا
تبدأ من الآخر ..
نصغر و ما نكبرش
و نعود و ما نرحلش
نرجع ولا نساfer ..
كان الحياة تبقى
يتلّف عكس بعكس
نخلف مسار الشمس
عكس أما كان دابر ..
نبدأ حياتنا زمان
و إحنا شيوخ عواجز
مسنودة ع العكاكيز

نستقبل الحاضر ..
و نرتب الماضي
ترتيب على كيفنا
نقتل تاريخ خوفنا
نرتاح ولا نعاقر ..
و يكون ف ألومنا
صورة من إالى فات
أيام ما كنا كبار
ذكرى ف طيف عابر ..
و نكون فى طفولتنا
لسا يادوب واصلين
علشان نموت ضاحكين
مع بعض فى الآخر ..

زمان

نسائم صُبح واخداني
لِحْتَنَّا و بيتنا زمان ..
و أيامنا و طعم البيت
و براويز الصور ع الحيط
و راديو الصُبح ع القرآن
و بُقعة حبر في قميصي
و مدرستي و كراريسي
و شخايطى على الجدران ..
و خناقاتي مع إخواتي
و حوادثي و حكاياتي
بَقْتُ ذِكْرِي و كان ياما كان ..
كانت أيام جميلة بجد
لكن عَدَدنا كان يبيد
و خدنا في زحمة النسيان ..

لو بایه یی

أیوة یامّه إزی حالک
عامله إیه ؟ ..
ألف حمد و ألف شکر
یامّه صوتک واطی لیه ؟ ..
لسا برضه زی مانتی
زی طول عمرک ما کنتی
شایلة بیتنا یاللی فیه ..
یامّه بکفاية إلی فات
من تاریخ ما أبویا مات
وإنتی ضهرک محنی یامّه
لما جملک زاد علیه ..
لسا فاکر یامّه صوتک
لما کنتی بتقولیلی

إني أرواح و أشد حيلي
كان في حُزن بتستريه ..
شُفت حُزنك من سكوتك
خُفتي يومها تشتكيلي
بس قلبي كان دليلى ..
قاللى ع إالى خبيتيه ..
كُنتى شايله هم سفرى
هم بُعدى و الغياب
كُنت ساييك للعذاب
كُنتى راضية برضه بيه ..
رُحت و أنا حالف عليا
إني لازم أبقي حاجة
لجل ما تحتاجي حاجة
م الزمن و الحوجه ليه ..
يامه جايلك بكرة بدري

جای و هفضل بین اییدی
جای اُسَدّ دینی فیک
إلی کُنتی بتدفعیه ..
یاّمه انا جایلک و واقع
جَهْرَیلى خُضن دافی
شوقی لیکى فوق کتافی
مَدّی إیدک نَزْلِیه ..
یاّمه قولى عایزه إیه ؟
عایزه أجیب ویاّیا فرحة
ولا أجییلک توب بـ طرحة
تدعى لّیا و تلبسیه ..
لولا یاّمه ظروفی خالفه
کُنت أجییلک و اُشتریلک
عاقبة بیها تشدى حیلک
عُمر تانی تعیشی بیه ..

على الموعد

على الموعد و بالتحديد
ظبطت الوقت ع الساعة ..
و وقت الجدّ لجل أهرب
عملت ظُروفي شتماعه ..
و يا خُساره
أدينني بقلّب الماضي
و مش راضي ..
عن العُمر اللي راح ببلاش
وضاع مَيّ
على الفاضي ..
ولا سمعاً ولا طاعه
و هعمل إيه

طبيعة نفسي طمّاعه ..

..

على الموعد و بالثانيه

حاولت أبدأ حياة ثانيه

حاولت أرمى القديم متى

لقيت كل إلى فيا قديم

و مستحملنى بالعافيه

مراية الدنيا ليه عميه

مبتشوفينش ..

لانا عارف أعيش راضى

ولا الفرحة

بترضى تعيش ..

و بستنى كثير ف الدور

و أقف في طابور

قليل البخت ميمشيش ..

وليه يمشي

مانا من صُغرى متعود على الدنيا

بتاخذ بس ما بتديّش ..

و بسألنى و أقول :

مالك ؟

و أزد : مفيش ..

صيطان البيت

خيال الماضي مش ساينك
معشش فوق بيان البيت
بتهرب منه و يقابلك
في صورة قديمة فوق الحيط
ساعات تسمعها بتقولك
فاكرني يا صاحبي ولا نسيت
ساعات بتحن للماضي
و تكره سيرته لو حنيت ..
و رغم إنك زمان حبيت
لكن قلبك رفض يختار ..
حلمت تكون فلان لكن
فلان أصلاً مخدش قرار ..
و مفتاح الأمل منسي

و متعلّق علي المسار ..
تشوفه كل ما تعدي
على السكة وع المشوار ..
يموت الماضي في الأسرار
و بس قصاد عنيك يظهر ..
في طفل يقرأ في الحوادث
و جُواك عُمره ما ييكبر ..
و لا قادر تصالحه ف يوم
و لا عُمرَك خلاص تقدر ..
حيطان الدنيا دي كبيرة
مفيش غيرك بقي يصغر ..
بتخسر يوم و يوم تخسر
و في الآخر تقول مليت ..
خيال الماضي مش سايتك
هيفضل فوق حيطان البيت ..

العَرَافَة

أَقْرَأ الطالِع
وَأَقْدِر أَشُوف مَكْتُوبِكَ شُوف ..
إِرْمِي بِيَاضِكَ
وَأَسْمَعْ مَتِّي وَبُكَرَةَ تَشُوف ..
إِرْمِي فَجَجْرِي
سِيكَّة سَقَرَك بَانَتْ بَدْرِي
سِيكَّة خُوف ..
بُكَرَةَ تَشُوف
لَوْ مَش شَايِف
بَايْن كُلِّ طَرِيقِكَ وَاقِف
مَبْمِشِيش
حَتَّى الزَّادِ فَوْقَ كَيْتَفِكَ نَاقِص

ميكفّيش ..

و أمّا تعيش ..

في الأيام هتجيلك فرصة

بس نصيبك منها

مفّيش ..

حظك م الأيام معروف ..

بكرة تشوف ..

قلبك طيّب

فاكر وقت الفرحة فريب

مبتشكيش ..

وقت الفرحة يا ولدي مسافر

و مبيجيش ..

و أمّا تعيش ..

خليك فاكر إن الدنيا

تاخذ منك و متديش ..

•
حتى طريقها معاك

مخلف ..

بكرة تشوف ..

سكة سفرك بانت بدري

سكة خوف ..

فضامة الرئيس (*)

السيد : فخامة الرئيس
إبنى مات فى الأتوبيس ..
ولا باقى منه حاجة
غير شوية كراريس ..
و شنطة فاضية و ساعة واقفة
و بقعة حمرا ع القميص ..
أُمه راحت لما سمعت
ان روحه الطاهرة طلعت
و ان مبقالهاش ونيس ..
هعمل ايه أنا بالفلوس
خد فلوسك وهاتلى ابنى
كان نفسى أشوفه فديوم عريس ..

المُعارِلة

المسافة بين عقولنا
والحقيقة تساوى (س) ..
ثم تكبر حبه حبه
ثم فجأة ينشِبُ شَبَّه
عيننا تبقى ألف عين ..
قيمة الوعى إلى جالنا
بالحساب بتساوى (ع) ..
شِلنا (ع) من (س) لقينا
المسافة برضه (س) ..
بعد وقت من المجادلة
قلنا نحسب فى المعادلة

نكتشف غلطتنا فين ؟

وإكتشفنا إن الحقيقة

برضه بعديت حبه حبه

ثم شئت برضه شئت

زادت المقدار بـ (ع) ..

فاحنا مهما نقيس و نحسب

بين عقولنا و الحقيقة

المسافة برضه (س) ..

•

الْعَدَم

معنى العدم ..

إنك بتعتاد الألم ..

مبقاش خلاص بيّبان عليك

ولا فارقه عندك مين ظلم ..

وأي صرخة ما بين ضلوعك

تتكتم ..

معناه بيان

وسط الدواير لخبطة

و حاجات كتير متشخبطة

فجرة قلم ..

معنى العدم يعنى الـ "مفيش"

مجنون يعيش

عابد و مؤمن بالصنم ..

إنك تكون لا شئ كبير

في الدنيا ضائع

وسط أشياءها الكثير

معنى العدم

إنك تكون صفر الشئ

جنب الرقم ..

حسبة كام؟

و راجع ثاني بعد سنين

و بعد ما عُمرِي لَفِ بلاد ..

و هسألُكم دا لو فاكين

بَقَالِي أَدِإِيه يا ولاد ..

بَعِيد عَنْكُمْ مَا شُفْتُونِي ؟

و فات كام دهر

في الأيام

و راح م العُمر

حسبة كام

و مات كام ضَيَّ في عيوني ؟ ..

هحاسبُكم و حاسبُونِي

هنجمع كُل يوم فاتكم

و عداؤُكم و أنا الغايب

و نطرح حَبّة الأبيض
من الشعر إلي بقي شايب ..
أنا الخسران
و أنا الخايب
و أنا السايب
فَ سِبْتُوني
لوحدي ويا كُوم تجاعيد ..
بيرسم سَطْرُه في ملاحي
و يبدأ ثاني سطر جديد ..
و لا كُتر الكلام هيفيد
أنا الغلطان
فَ سامحوني ..

عاش الملك

عاش الملك

صُفُوا الصفوف ..

دقوا المزاهر و الدفوف

علق زينات و إملا الكاسات

شربات و هات

الناس تشوف ..

عاش الملك

صُفُوا الصفوف ..

عاش الملك فوق الرقاب ..

فوق عبد عاصي

و عبد تاب

إرّكع عشان ضَعَفَك بيان

إرّكع كمان

إرْكَعْ بِ خُوفٍ ..

مات الملك

هْدُوا الصفوف ..

مات الملك مطرَح ما راح

ولا حَدِجْه ولا حَدِ راح

ييجي الحديد فوق العبيد

سيفه الحديد لَمْ الصفوف ..

عاش الملك

هاتوا الدفوف ..

مات الولد

قال للأبد

قالت معاك

شِ الله يا سيد الأوليا

و مدد مدد ..

قام الولد

يجرى في حوارى دُنَيْتِه

لَقَّ الشوارع و البلد ..

علق آماله ع الطريق

و رَبط جِباله في الوند ..

رَتَّب في رُوحه المصطبة

فَتَح شبابيكه و قَعَد ..

لَوْن حيطان بيته القديم

شَد الستائر و إتحَمَد ..

أحلامه ليه طالها الوبا
كوايسه زادت في العدد ..
راح الولد
يحكى لمرايته ع المنام
قال الأمل .. قالت شرد ..
لو كنت قدّمت الهوى
كنت إلتقيت عنده السند ..
قام الولد
يجرى في حوارى دُنَيْتُه
لَفّ الشوارع و البلد ..
لم آماله م الطريق
فَكَكْ جباله م الوند ..
بعتر سنين عُمره الهوى
طَبَّ القدر
مات الولد !

عصفور

كان عَصْفُور

عائش يحلم بالعصفُورَه

راسم حِلْمُه الحَيِّ فِ صُورِه

و معلقها فِ وَسط الحِيط ..

فيها حروف أول أساميهم

فيها الحِلْم الساكن فيهم

فيها العِش و فيها البيت ..

خاف العصفور من أحلامه

ف لحظة طيش ..

خايف يجبس قلبه الطيب

جُوءه الريش ..

كان متحير

خايف يطلع عُمره قصير

ميكفیش ..
قرر يهرب م العصفورة
رفرف برّه حدود الصورة ..
لَفّ الدُّنيا بملو جناحُه
راح لبعيد ..
تاه في زحام الكون الواسع
و المواعيد ..
فكّر يرجع
بعد ما شاف الغربة بتوجع
كُلّ وحيد ..
بس خلاص كان فائته أوانه
عصفور تاني جه في مكانه
كَمَل حِلْمُه مع العصفورة
عايش جُوه حدود الصُّورة !

هُوَ وَ هِيَ

(هُوَ)

بعد أما فاتت م السنين ثلاثين
تفاصيل ملاحك هَيَّا هَيَّا نفسها
معقول فضلتى صُغِيرَة رَغْم السنين ؟
شكلك كأنك لَسَه فى العِشرين
رَغْم إن شِيبى حَظ راسى كُلِّها ..

(هِيَ)

شكلك نسيت إن إلى راح
مش راح يعود ..
و إلى إنت تقصدها خلاص
سابت الوجود ..
أما أنا فعلاً بِجَد أشبهلها
لأنى أبقى فى الحقيقة .. بنتها !

مصاير

هي مصاير
و بتتقسّم جُوه دواير
زي العادة ..
ييجي نصيبك مرّة زيادة
و مرّة مفيش
دايره كبيرة لأكل العيش
مرّة تجيلك جلّوه بـ سُكّر
مرّة تجيلك علقم سادة
زي العادة ..
بنعيش في دواير متعاده
مبنشوفهاش
دايره جلمك طالعة معاش
فاتت بيك الدايرة بسرعة

في حكاوي الدُّنيا المُعتاده ..

هي مصاير

و بتتقَيِّم جُوه دواير

زي العادة ..

وشوش تجاعيد

و برغم الصحرا اللي ف جيئه
و القَطع البالين في الكوتشي ..
و سنائه الأبيض من شَعْرُه ..
و بلوفر صُوف مبيسترشي ..
كان ماشي بيضحك ع العالم
و مكمل مَشِي و موقفشي ..
يتمسخر ع الدُّنيا الجارحه
و ينادي على الخلق السارحه
ريجه يا أستاذ ريجه يافندي
برفان مُستورد مَوردشي ..
شُوفي يا هانم بُصي يا أبله
تتَرش الريجه و متروحشي ..
و يقول و يعيد و يعيد و يزيد

لـ وشوش مفيهاش غير التجاعيد
الناس ليه حالفه متضحكشي ..
دا برغم الصحرا اللي ف جيئه
و القَطع البايں في الكوتشي
كان ماشي بيضحك ع العالم
و مكمل مَشي و موقفشي ..

جُزء مِثْلِي

جُزء من حُبِّكَ مصالِح
جُزء من خوفِكَ خضوع ..
جُزء منك كان شباته
لما جت ف عنيكَ دموع ..
كُنت ماشي ف سِكِّه لكن
جُزء من خطاويكَ رجوع ..
جُزء منك مُصطنع
كُنت شاپيف إنه عادي
جُزء منك لا إرادي
كان ييفرح في الوجع
جُزء ثاني جُوه مِثْلِكَ
كُنت ندل و كان جدع
بس مات بين الضلوع ..

بعد ما ستّم

بعد ما صلّى
و بعد ما سلّم
بعد ما صمت ضميرُه إتكلّم
حَسَّ النور بينوّر قلبه
بعد ما كان مهجور و مضلّم ..
كان متألّم ..
ولا كان شايّف .. ولا كان سامع
راح سلّم على شيخ الجامع
حرماً - مالك ؟
جمعاً - ضايّع ..
حاسس إنيّ بِلُفّ دواير
تايه حاير
جيت متعشّم ..

ع القهوة

ساعات لما المزاج ييضيق

و إذ فجأة و على سهوة ..

ألاقي رجلى واخذانى

و نازلة يتآع القهوة ..

بدون ترتيب ..

ف نفس الكرسي كالعادة

أروح و أقعد يقولى أوامر

و أطلب سُكرى زيادة

ف شاي بجليب ..

أشوف الناس و أتعجب

من الضحك إلى ف وشوشهم

كأن الدنيا بتعيشهم

أقلب شاي و أنا سارح

يدوب همى مع التقلب ..
هناك برتاح عشان فى ناس
أنا أعرفهم و معرفهمش
بنتقابل هناك صُدفة
و نعزم بعض ع المشاريب ..
بنلعب عَشْرَة الطاولة
ورا العَشْرَة
دورين عادّه
و واحد مَرش بالقواشيط
و زهر يخيب
و زهر يصيب ..
و نلعب دومنو و أغمزله
يجبيلى جَهار
عشان الدُرَجى فإيديهم

يموت يا حمار
و تبقى العشرة جت ف الجيب ..
و ييجى الماتش نتفرج
و بنشجع و بنهرج
و نترأى على الخسران
يجيب اللوم على الحكام
وع الحارس وع اللعيب ..
يا صاحبي القهوة دى دُنيا
مكان فاهمك و بالمطبوط
تروحها و إنت متضايق
و ف دقائق تكون مبسوط
و مهما تنشغل و تغيب
مسير رجلك هتاخذك يوم
على القهوة بدون ترتيب ..

سهرة ع الرايو

ويا الليل أنا كنت لوحدي

شارد سارح قاعد أفكر ..

لكن راح النوم من عيني

رغماً إن الوقت إتأخر ..

قررت أسهر

جه على بالي الراديو بتاعي

إلي بقاله سنين متشال

قمت و جبته مش شغال !

إتصرفت و جبت حجارة

شدت الإيريال من بعضه

و إستنييت يلقط إرسال ..

موجه ل موجة

كان ياما كان ..

”كَانَ الْفَارُشُ نَوْرَ الدِّينِ
يَبْحَثُ عَنْ بِنْتِ السَّلْطَانِ
فِي الصَّحْرَاءِ وَ قُرْبِ النِّيلِ “..
يَنهَارُ أَبْيَضُ
زَوْزُو نَبِيلِ !
نَفْسُ الْمَشْهَدِ بِالتَّفَاصِيلِ
حَاسِسٌ إِنْ أَنَا عَاشِيهِ زَمَانِ
مَلْعُونُ أَبُو أُمِّ النِّسْيَانِ !

قالولنا زمان

و قالولنا مَرَّة زمان
إن السماح نعمة
وإن الغضب بُركان ..
قالوا الشيطان شاطر
هيكون عليك قادر
لو حَسَّ بيك خيبان ..
داير مع الدائرة
و السكّة بتوديك
ويّاها لو سايرة
و الأرض لو بايرة
هيجيلها يوم تطرح
و الذكرى لو تيجرح
ف مسيرها للنسيان ..

تَشْكِي لَمِين مِن مِين ؟
دا الدُّنْيَا زَرْزَانَةٌ
مِلْيَانَةٌ بِالمَسَاجِينِ
مَاتُوا البَشَرُ مَسَاكِينِ
عَاشَ إِلَيَّ كَانِ سَجَّانِ ..
قَافِلَ عَلَيَّكَ تَرَبَّاسِ
حَاسِبِ عَلَيَّكَ نَفْسُكَ
خَلَائِكَ غَرِيبِ النَّاسِ
وَالْجَنَّةُ مَا بَتُّنَدَاسِ
لَوْ كُنْتُ فِيهَا وَحِيدِ
وَيَايَه نَعِيمَهَا يَفِيدِ
لَوْ كَانِ مَفِيشَ خَلَانِ ..
يَتَشَارَكُوا وَيَاكَ فَيَكِ
تَبْكِي فِي مَوَاجِعُهُمْ

يَكُونُ مَعَكَ وَ عَلَيْكَ
تِيحِي الدَّمْعُ فِ عَيْنِكَ
عَلَى خَدُّهُمْ تَتَشَافُ
إِوَعَاكَ تَمُوتُ خَوَافُ
إِيَّاكَ تَعِيشُهَا جَبَانُ ..
مَكْسِي بِإِلَيْسٍ ضَعِيفُ
رَاكِنٌ عَلَى عُكَّازِ
مَكْسُورٌ وَ عُودُهُ نَحِيفُ
خُذْ مِنْ طَرِيقِكَ سَيْفُ
مَسْنُونٌ عَلَى الْأَيَّامِ
قَدْرُكَ فِي مَشْوَارِكَ
إِنَّكَ تَكُونُ إِنْسَانُ ..

مفیش مُطلق

مفیش فی الدنیا شیء مُطلق
مفیش ثابت ولا مقیاس ..
و أبعاد الحیاة فینا
لا بنقیسها ولا بتتقاس ..
شعورنا بکل شیء نسبی
حسب نظرنا للأحداث ..
تدور أحوالنا ع المركز
و مرکزنا مالهوش أساس ..
ساعات بنشوف ضیقنا براح
ساعات بنشوفها ١٠٠ ترباس ..
و یاما حاجات بتفرحنا
تكون أصلاً
مصایب ناس ..

مقاصير

بيننا مفيش مترين
لكننا بعدنا ..
الله يجازي الموت
لخبط مواعيدنا ..
كنا ف مكان واحد
خُضْرَة و زرع و نور ..
سيكن المرض بدتك
و جلف عليك ما يسيب
ما بقاش نافعه طيب
ولا سحر
ولا مسحور ..
جاي الأجل يجري
إكتمها المقادير

و الموت مالوهش كير
و معاده مش بالدور ..
ف بقيت أنا فقبري
و إنت إلی جی تزور ..

الفرس

لسا الأنين بعد السنين
واقف في صوتي إلى إتخرش ..
بعد أما كان صوتي زمان
يشبه كثير صوت الجرش ..
إيه العمن راح الأمل
راحت معاه كل الفرض ..
فين إلى فات و الذكريات
فين إلى في الماضي إتغرش ..
رَحَال و تاه خَلَفْتُ معاه
معكوس بـ عكس إلى إتعكش ..
مع خيل أصيل فارس نبيل
مش لاقى مربوط للفرش ..
و إزاي أعيش و الزاد مفيش

و العُمر ماشى بينتَقْص ..
لفيت بلاد جيت ع المعاد
سلّمت نفسى للحرش ..
و مصيرى موت و بأعلى صوت
حكموا على خيلى إتحبس ..
من حُبى فيه بصيت عليه
ودّعته فى آخر نَفْس ..

فكرة

أنا فكرة مبعوثشي ..

أنا حدودة في خيالك

مبتنامشي ..

أنا نفسك أنا إنتي

أنا سامعك

ولو صوتك مبيقولشي ..

تروحي لفين و أتوه عتتك

و أنا ضل الخيال منك

ملازمك كل ما تمشي ..

تداري عنى أسرارك

و تخفي في البيوت دراك

و فاكهه هتخفي أفكارك

و معرفشي ..

أنا سرك ف بير مدفون
أنا مراية براح الكون
و عينك فيا لو تفرق
ما هتشوفشى ..
أنا الحارس على عنيكي
و مها تتوهي هلاقيكي
ياخوفي ف يوم أتوه فيكي
و مارجعشى ..

زى النهاردة

زى النهاردة من زمان
شوفي فات علينا كام سنة ..
أيام ما كنا صغيرين
فى المدرسة إنتى و أنا ..
يوم لما شُفتك
ماشية ويا صاحبتك
ولقيتني بمشى
غصب عنى ف سكتك
و أما تغيبي كنت بسأل هى فين
يقولولى عدّت من هنا ..
أفضل أروح بعنيا بين كل البنات
الأقيكى واقفة
بتضحكىلى من سُكات

أضحك و ألاقى الفُسحة خِلصت و الجرس

يضرِب و يهدم فَيَا لحظات الهنا ..

شوفي فات علينا كام سنة ..

كُنت أما أشوفك

و إنتى واقفة ف الطابور

وشيك ف نور الشمس

كان بيزيده نور

كان حلم عمرى

إنك إنتى تبقى لِيَا

و كنت دائماً

أفضل أدعى ربنا ..

شوفي فات علينا كام سنة ..

و لما خدت قرارى يومها إنى أقول

لقيتني جايك بندهك

عند الفصول

و قتلتك يومها إني عايزك تفهمي

أنا كل طلبى

بس نبقى لبعضنا ..

و أدينى بالوعد إالى قلته زمان وفيت

و بقى لينا أسرة صغيرة

و بقى لينا بيت

بنتين و أم و أب و سعادة و فرح

أحسن من إالى كان بيعجى ف حلمنا ..

شوفي فات علينا كام سنة ..

نفس الجرائين

لِسَانَا يَنْقَرَا وَ يَنْتَابِعْ

نفس الأخبار جُوءَ الجرائين ..

جورنان اليوم

جورنان بكرة

جورنان إمبارح

كله حزين ..

نفس الصورة ف أول صفحة

نفس الحادث

نفس المساجين ..

حتى المساكين

لِسَانُهُمْ جُوءَ حُدُودِ الْوَحْلِ ..

أخبارُهُمْ زِي زَمَانٍ وَأَسْوَأُ

"محدودي الدخل" ..

نفس المانشيت بقالُه سنين

يا بلاد مجانين ..

لِسّاها بتقرا و بتصدّق

كِدب الجرانين

هنتفارق

و لما خيالي يسرقي
و أفكر في إلي مش معقول
بلاقي الفكرة تقتلني
و أخاف لحظة
ف أخاف عطول ..
و أقول مين إلي هيوصل
و مين فينا إلي هيحصل
و مين يقطع بين عمره
و مين بابه
بيات مققول ..
بخاف جداً
و أخاف عطول ..
و خو في ع النفس موصول

و في الآخر
ماهوش فارق
عشان العمر مهما يطول
هنتفارق هنتفارق ..

غربة

و جاوبت عليه بكل صراحة

- أنا مش فاكّر

أنا آخر حاجة فذاكرتي

يوم لما نويت إني أسافر ..

جبت تذاكر ..

ودّعت الشارع و الحارة

و ملّيت الشنطة بأحلامي

و طلّعت ركبت الطائرة

و إتقفّل الباب ..

كان شكل الغربة بيتسرسب

عليّ كل وشوش الركاب ..

و شُنتْهُمْ برضه معبّية

أحلام و ضباب

و کلام حوادیت

و امل کتاب ..

کان بیطمئنهم بر جوعهم

بالرغم إن مصیرهم أصلاً

کان باین جدأ فی دموعهم

کان کله سراب ..

قليل الصيلة

كُنت مافي بيدي حيلة
كُنت قاعد من سُكات ..
المكان كان هو نفسه
و الجديد زى إالى فات ..
عيني رايحة شمال يمين
تايمه مِنّى فى الحاجات ..
و التراب فوق الرفوف
و الحيطان فيها مرايات ..
هيتا هيتا من سنين
كُنت متكثف فى كُرسى
و إالى جنبى مكثفين ..
فى المراية شفته جايلى
كان يقرب خطوة خطوة

جِه ورايا بخطوتين ..
راح باصلى فى المراية
يا بتسامته الصفرا قاللى :
"إيه يا راجل كنت فين ؟
دانتا غبت حوالى شهر " ..
قُلتله : كان عندى شغل
جَاب مَقَص و مِشْط واسع
قاللى " دقن ولا شَعر ؟ " ..

حاجز

و حاجز نفسي عن نفسي
و يهرب مني جوايا ..
كثير يبعد و أروح فتيا
و أرجع ليا ويايا ..
و من ثاني نتوه من بعض ..
و نوعد نفسنا ثاني بنفس الوعد
و نفس الورد
في نفس الفازه هياها
و نفس الضلمة في الكشاف
و إيه باقيلنا وياها ..
و إيه فاضل عشان يتشاف
و أنا في الضلمة
لسا بخاف !

الفرصة

يا خايف ع إللي بين إيدك
و عايز م إللي لسا مجاش ..
عشان تمسك حاجات تسوى
لازم ترمي إللي مايسواش ..
يا مستتي إللي جاي بكرة
مفيش فرصة بتيجي بلاش ..
و ماسمعناش في يوم أبدأ
عن الدنيا بـ تدي و بس
عصاية بكرة مش ممكن
في مرة تتمسك م النص
و أحسنلك ما تمسكهاش ..
محدث طايطى للدنيا
و كمل فيها حلمه و عاش ..

مشوار

كان وياها رايجين مشوار
ثم سابتة و قالتله ثواني ..
نص دقيقة يادوب راجعالك
مش هتأخر إستناني ..
غابت حبه و فات الوقت
خايف هو لـ متجيش ثاني ..
كل شوية يبص ف ساعته
حبه ف حبة
لحد ما نام ..
قام على صوتها و هي بتسأل
آسفه يا أسطي
حسابك كام ؟ ..

حَسَنَه

كُنت تايه في الشوارع
داير أسأل مين يغيتني ..
جتلي هيا ووققتني
كلمتني ..
لج تطلب مَيَّ حَسَنَه
تدعي دعوة بظهر غيب ..
رُحَت مادد ليها إيدي
باللي كان فيه النصيب ..
شئ غريب
لما جت هَيَّا و قالتلي
شُكراً إنك بتساعدني ..
والحقيقة الغاية عنها
إن هَيَّا إلي غاتتني ..

شمال

هو إحنا شمال

ولا إحنا يمين ؟

طب أسأل مين ؟

طب راس السهم على الياقطة

بتؤدي لفين ؟

مش جازر يبقى الكون أصلاً

مقلوب رأساً

ع البنى آدمين ..

فيخلّي ساعتها

شمالنا يمين

و حرامنا حلال ..

و ساعتها نهلل و نكبر

إن إحنا شمال ..

قصا قيص

(الصبر)

وقت أما كان الصبر جاي جاهز
كان الوجع جاي بالمقاس تفصيل ..
قال البدن للصبر: "مش عايز"
دا الحجة صحه و إللي فيها يشيل ..
كابر عشان الهيبة ، أو جاز
خايف يبات يصبح بروحه عليل ..
صبح الصباح راقد ما يتحرك
فارس و راحل بس من غير خيل ..

(منسي)

عاش الحياة منسي
إكته كان غايب ..
قسّموا الفرح بينهم
ف مكاش له نايب ..

(وشوش)

لما يتكشف المحبى
جوه منكم متخافوش ..
عادى جداً يبقى فينا
وش غير مبنشوفوش ..
حالنا هو نفس حالكم
كلنا لابسين وشوش ..

(نفس المكان)

إحساس غريب
لو يوم تروح نفس المكان
وتحس نفسك فيه غريب ..
تلقى الوشوش غير الوشوش
تلقى الكلام أصبح كتيب ..
من بعد ما يفوت الزمان
تيجي المكان ظنك يخيب ..

(نفس الناس)

نفس الكرسي أبو شلته إياه
نفس القهوة ف نفس الشارع ..
نفس الطاولة بنفس حُظوظها
نفس كانون الفحم الوالع ..
نفس الواقع نفس الناس
لِسه كلاًهم كُله مواجع ..

(إتاخر)

كان يقول دي مش مستاهله
و مفيش حُزن يدوم للآخر ..
و أما شكيتله لقيته يقول
شوفي مكان جنبك و إتاخر ..

(تشرې شاي؟)

جَيّ بتسأل عايش إزاي ..

عادی مفیش

زَيّ ما كُل الناس بتعيش

بُكَاع الفايِت - خوف م الجاي ..

و إلی ما بینهم صمت طویل

لحن حزائنی بصوت النای ..

سبيك مَيّ و زُد عليّا

تشرې شاي ؟

(صبح الفل)

صبح الفل و الياسمين

صبح صافي و كله حنين ..

لعربية عليها الفول

و قرن الفلفل المغسول

مع الرغيفين ..
و مئة سلطة و الجرجير
مع مخلل في صحن كبير
و حبة ملح تخزي العين ..
تقوم تحبس بحبة شاي
تصبح ع الراح و الجاي
تبوس إيدك على النعمة
و تضحك ع اللي مش حاسين ..

(المفتاح)

ياللي حمولك حَجَر .. بكرة الحمول تنزاح ..
هانت و فَرَجُه قريب .. إصبرُ عشان ترتاح ..
خُدم النهار الضيِّ .. خُدم من شُمُوسه سلاح ..
و لو النَّصيب مقفول .. دَوَّر على المفتاح ..

(صدفة)

لسا فآكر يومها لما
شفت اسمك ع الكتاب ..
كنتي صدفة و من يومها
فص ملح و فجأة داب ..
و النهاردة الصدفة تيجي
تاني من بعد الغياب ..
بس إيه فائدة لقانا
بعد لما الشعر شاب ..

(فالصو)

و كام من حاجة جُوانا و بنداري و مبنقولهاش ..
و كام من كلمة بنقولها و في الآخر منعملهاش ..
و في الظاهر نساوي كتير و بيننا و بيننا ما بنسواش ..
حاجات فينا تيان حلوة .. لكن إحنا منشبههاش ..

(حاجة تحير)

عايز أتغير ..

و أرجع زى ما كنت صغير ..

مع إني ف أيامها تملّ

كنت انا بسأل إمتى أنا هكبر ؟ ..

أما دى فعلاً حاجة تحير ..

(سايها وفات)

سايها ف نص الرحلة و فات

غاب مبقاش بيعت جوابات

لكن لسا بتحكي حكايته

رغمًا إنه فارقها و مات ..

(صوان الضمير)

صوان للشهاته

و ريحة نجور ..

و دُور حاجة ساقعة

لكل الحُضور ..

طابور كان كبير

مشاهد كثير ..

شوارع ميّتم

مقابر ضمير ..

مكانك يافندي

و حاذى الطابور ..

(الباقى من ضلّى)

طلعت عليا الشمس فوق راسي بالمللي ..

دوّرت جنبي أشوف إيه باقى و فاضلّي ..

مش لاقى جنبي غير الباقي من ضلّي ..

فوق رمل قايد نارو الحصو ييقوللي ..

الدنيا واخدة الناس

حتى إللي كان خلّي ..

(قليل البخت)

و ليه كل إللى بيجيلنا .. فثائتة بعدها بيروح ..

و ليه يا دُنيا بتعاندى .. و بابك ع الفراق مفتوح ..

دا لما البخت كان صاحح .. قليل البخت كان مجروح ..

(قلب جديد)

و ليه الكل بيقترب
و أنا لوحدي فضلت بعيد ..
و يمشوا في الطريق ضجة
و أنا إالي تملّي ببقى وحيد ..
و ليه أنا قلبي بقى قاسي
و ليه مقفول و بابّه حديد ..
أمانه عليكموا يا حبايب
محدث عنده قلب جديد ؟ ..

تم بحمد الله

للمتابعة على الفيس بوك :

الحساب الشخصى

<https://www.facebook.com/nabil.ab7meed>

أو من خلال صفحة "قلم رصاص"

<https://www.facebook.com/pencil.writer>

الفهرس

٩.....	من الشبه أربعين
١١.....	عقارب ساعتي
١٣.....	الميكروباص
١٦.....	جائز خير
١٨.....	نظريات في المراية
٢٠.....	سلام
٢٢.....	قانون الدنيا الساهر
٢٦.....	ساب الحاجات
٢٨.....	حُمص شام
٣٠.....	كادرات
٣٣.....	مات مسكين
٣٥.....	لو مسافر
٣٧.....	حسابك صفر
٣٩.....	تذكار
٤١.....	توب الخيش
٤٤.....	عزيزى المواطن
٤٦.....	فيزيا
٤٩.....	حد متعرفوش

٥٢	عادي
٥٤	الشنطة
٥٦	أحارب كيف ؟
٥٨	حلم و عاش
٦٠	الوابور
٦٤	شاييل كثير
٦٧	يبقى مين ؟
٦٩	على فين ؟
٧٢	بنكبر
٧٣	ع البلاط
٧٥	فاعل خير
٧٧	آخر الدهر
٧٩	هات أماراة
٨١	حلم ميت
٨٢	دُرج السنين
٨٤	طبله و رقارة
٨٩	بواقى
٩١	عكس ب عكس
٩٣	زمان

٩٤.....	لو يا يدي
٩٧.....	على الموعد
١٠٠.....	حيطان البيت
١٠٢.....	العرافة
١٠٥.....	فخامة الرئيس (*)
١٠٦.....	المعادلة
١٠٨.....	العدم
١١٠.....	حسية كام ؟
١١٢.....	عاش الملك
١١٤.....	مات الولد
١١٦.....	عصفور
١١٨.....	هو و هي
١١٩.....	مصابير
١٢١.....	وشوش تجاعيد
١٢٣.....	جزء منك
١٢٤.....	بعد ما سلم
١٢٥.....	ع القهوة
١٢٨.....	سهرة ع الراديو
١٣٠.....	قالولنا زمان

١٣٣	مفیش مُطَلَق
١٣٤	مقادیر
١٣٦	الْفَرَس
١٣٨	فِکرة
١٤٠	زى النهاردة
١٤٣	نفس الجرائین
١٤٥	هنتفارق
١٤٧	عُربة
١٤٩	قلیل الحيلة
١٥١	حاجز
١٥٢	الفرصة
١٥٣	مشوار
١٥٤	حَسَنَه
١٥٥	شمال
١٥٦	قصاقيص

